

**Ilinniartitsisunngorlaat meeqqanut inuusuttunullu tarnikkut ajornartorsiutilinnut
pitsaanerusumik
sullissisinnaangornissaat anguniarlugu ilinniartitsisunngorniarnermi tarnip pissusaa
pillugu
ikiuigasuarsinnaaneq aammalu meeqqat tarnikkut nappaatigisartagaat pillugit
ilisimatusarneq
eqqunneqarnissaat anguniarlugu Naalakkersuisut sulissuteqassallutik
peqquneqarnissaat pillugu
Inatsisartut aalajangiiffigisassaattut siunnersuut
*Anna Wangenheimimit, Demokraatit, saqqummiunneqartoq***

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Nivi Olsen, Demokraatit, siulittaasup tullia
Inatsisartunut ilaasortaq Lars Poulsen, Siumut
Inatsisartunut ilaasortaq Harald Bianco, Inuit Ataqtigiit
Inatsisartunut ilaasortaq Eqaluk Høegh, Inuit Ataqtigiit

UKA2022-mi ulloq 20. oktober 2022 siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Misissuinerit kiisalu IMAK-imit oqaaseqaatit nunatsinni meeqqat atuarfiini ajornartorsiuteqartoq takutimmassuk ilinniartitsisunngorniarnermi tarnip pissusaa pillugu ikiuigasuarsinnaanerup aammalu meeqqat tarnikkut nappaatigisartagaat pillugit ilisimatusarnerup eqqunneqarnissaat anguniarlugu siunnersuummi matumani Naalakkersuisut sulissuteqaqquneqarput. Meeqqat atuarfiini ingerlalluannginnerup pinaveersaartinneqarnissaa

siunnersuutip siunertaraa, tassani meeqqat inuusuttullu tarnimikkut nappaatigisartagaat pillugit ilinniartitsisunngorniat qanoq iliorsinnaanermut ilisimasanik tunineqassallutik.

2. Siunnersuutip Inatsisartuni siullermeerneqarnera

Siunnersuutip siullermeerneqarnerani Naalakkersuisut allannguutissatut siunnersuummik imatut isikkoqartumik saqqummiussipput:

“Inatsisartut aalajangiinissaannut siunnersuut, tarnikkut ikiueqqaarnermik aamma meeqqat tarnikkut akornutaannik ilinniartitsisut ilisimasaannik nukittorsaanissamut periarfissanik Naalakkersuisut misissueqqullugit peqquneqassasut siunertaralugu ilinniartitsisut siusissukkut iliuuseqarnermi annertunerusumik ikiuuttarnissaat. Misissuineranut nassuiaat innersuussutit ilanngullugit UKA 2023 sioqqullugu Inatsisartunut agguanneqassaaq”.

Meeqqat atuarfiata suliffeqarfittut nukittorsarneqarnissaata pingaaruteqassusaa kiisalu nalinginnaasumik meeqqat ingerlalluarnissaasa pingaaruteqassusaat oqallinnermi ukkatarineqangaatsiarpoq. Ilutigalugu eqqaaneqarpoq ilinniartitsisut piginnaatinneqarnerat meeqqat ingerlalluarnissaannik atuarfimmillu pitsaasumik qulakkeerinninnissamut aqqutissaasoq. Atuarfik pitsaasoq meeqqallu ingerlalluarnissaat qulakkeerneqassappat soqutiginnittut assigiinngitsut, soorlu ilinniartitsisunngorniat ilinniartitsisullu, tusaaneqartariaqartut eqqaaneqarpoq. Taamaattumik siunnersuutip ataatsimiititaliamut suliassanngortinneqarnissaa inersuarmi isumaqatigiissutigineqarpoq, tassani ilinniartitsisunut piginnaatitsinerit eqqortut qanoq pitsaanerpaamik qulakkeerneqarsinnaanersut qulaajaavigineqassalluni.

3. Ilisimatitsiffiusumik ataatsimiinnerit

Immikkoortumik suliarinninnermut atatillugu ataatsimiititaliap Ilisimatusarfik aamma Ilinniarfissuarmi elevrådip sinniisui ilisimatitsiffiusumik ataatsimeeqatigai. Tassunga atatillugu illuatungeriinnit apuukkusunneqartut:

- Immikkut ittumik perorsaariaaseq ilinniartitsissutissanut ilaasussaasoq, kiisalu ilinniartitsissutini assigiinngitsuni arlalinni sammineqartarluni. – Soorlu assersuutigalugu meeqqanut immikkut pisariaqartitsisunut immikkut ittumik atuartsissuteqarnermik ukkatarinninneq.
- Ilinniakkami ilinniartitsissutini arlalinni oqaloqatiginnittariaaseq nalinginnaasumik ukkatarineqartartoq.
- Ilinniakkami aqqissuussami nutaamik atuartsissutissamik ilanngussisoqassappat taava atuartsissutaareersut arlaat peerneqartariaqassasoq.
- Annerusumik atuarfinni tarnikkut nappaatit pillugit ilinniartitsisut qaffassarneqarnissaminnik pisariaqartitsisartut.

4. Ataatsimiititaliap siunnersuummik suliarinninnera

Siunnersuutaqaartumi Naalackersuisullu allannguutissatu siunnersuutaanni sullinniakkatut anguniakkat siunnersuummi allanngortinneqarsimani assiingissutaasut ataatsimiititaliamit paasineqarpoq. Ilinniartitsisunngorniarniq ilinniartullu kisiisa ukkatarinagit allannguutissatut siunnersuummi ilinniartitsisut tamarmik tarnikkut ikiueqqaarneq aamma nappaatit suussusii pillugit ilisimasaqartariaqarnerat ammaaffigineqarpoq. Taamatuttaaq ilinniartitsisut suliasaqarfiup tamatuma iluani ilisimasaannik nukittorsaanissamut periarfissat pillugit Naalackersuisut UKA 2023 nallertinnagu nassuiaammik saqqummiussinissaannik peqquneqassasut ataatsimiititaliamit oqaatigineqarpoq. Siunnersuutip naammassineqarnissaanut siunnersuutaqaartumi ullussamik taasaqartoqanngilaq.

4.1 Ilisimasat ilinniartitsisunut ilinniarsimasunut anngutsikkusutat

Ukiuni kingullerni immikkut ittumik perorsaariaaseq ilinniartitsisunngorniarnermi ilinniartitsissutissanut ilanngunneqarsimasoq, kiisalu oqaloqatiginnittariaaseq sammineqarnerulersimasoq ilisimatitsiffiusumik ataatsimiinnerit tunulequtaralugit ataatsimiititaliamit paasineqarpoq. Tamanna tunulequtaralugu ilinniartitsisut ilinniarsimasut piginnaasaannik qaffasaanissaq annertunerujussuarmik ukkatarineqartariaqartoq ataatsimiititaliaq isumaqarpoq, kiisalu atuarfiit pisortanilu susasaqarfiit allat akornanni suleqatigiinnerup nukittorsarneqarnissaa qulakkeerneqartariaqartoq.

5. Siunnersuutip aningaasatigut kingunerisassai

Inatsisartut suleriaasianni § 33, imm. 1, allaqqavoq siunnersuut tunngavilersugaassasoq siunnersuutillu aningaasatigut allaffissornikkullu kingunerisinnaasai allaaserineqarsimassasut, aalajangiiffigisassatut ilusilerneqarsimassalluni taaguuserneqarsimassallunilu. Siunnersuutip aningaasatigut qanoq kinguneqassanersoq tunngavilersuutigineqartuni ersarluttoq ataatsimiititaliamit maluginiarneqarpoq.

6. Ataatsimiititaliap inassuteqaatai

Ataatsimiititaliaq isumaqatigiittoq ima ittumik allannguutissatut siunnersuummik akuerisassanngorlugu saqqummiussivoq:

“Inatsisartut aalajangiinissaannut siunnersuut, ilinniartitsisut siusissukkat iliuuseqarnermi annertunerusumik ikiuussinnaanissaat siunertaralugu tarnikkut ikiueqqaarnermik aamma meeqqat tarnikkut akornutaannik ilinniartitsisut ilisimasaannik nukittorsaanissaq pillugu nunatta atuarfiini pikkorissaatitsisarnissamut periarfissanik ujartueqqullugit Naalackersuisut sulissuteqassusut. Ilanngullugu atuarfiit pisortallu susasaqarfii allat attuumassuteqarsinnaasut soorlu assersuutigalugu MISO, peqqinnissaqarfik allallu akornanni suleqatigiinneq qanoq qulakkeerneqassanersoq pikkorissaanermut ilaatinneqartariaqarpoq.”

Taama oqaaseqarluni isumaliutissiissummilu allassimasunut paasinnilluni ataatsimiititaliap siunnersuut aappassaaniigassanngortippaa.




Doris Jakobsen Jensen
Siulittaasoq




Nivi Olsen
Siulittaasup tullia



Eqaq Høegh



Najaaraq Møller



Harald Bianco